


美國紅十字會兒童出版部

紅十字會之歷史



扶危濟世 憫人救苦 黃白視人 一視同仁



上海商務印書館發行

The American Junior Red Cross Committee which publishes this book represents more than 1,000,000 members of the Junior Red Cross in America.

The publication of a number of Junior Red Cross books is contemplated. We trust that through these publications the millions of Red Cross Juniors in America may be united with the millions of boys and girls in China in one big movement to help make all children healthier and happier and to give relief wherever needed.

The committee hopes that the Chinese teachers, the missionaries, Young Men's Christian Association and Young Women's Christian Association secretaries may find this book and those to follow useful as textbooks in course on social service.

J. C. McCracken
Director

序

此書爲美國紅十字會兒童部董事所發刊、董事者、美國、壹千萬兒童會友之代表也、今本會擬刊關於紅十字會書籍數種、欲藉此使華美兩國紅十字會兒童會友、互相聯絡、且以增進兒童體質之健康、心靈之快樂、並實行社會服務也、本董事會深望此書有益於中華生徒、凡教員教友以及男女青年會幹事、教授社會服務者、採此以作教科書之用、可也、

中華民國八年一月莫約西識於上海

美總統威爾遜對於全國中小學校學生之訓
詞

美國之總統、亦卽美國紅十字會之總裁也。余既以一身兼此二職、當此全國學校始業之際、不得不貢一言以爲諸生祝進步。

美國紅十字會方欲組織兒童會員部、以推廣紅十字之偉業。如是則諸生亦將得爲國服務之機遇、何幸如之。學校者、一天然之社會服務之重要機關也。吾國今爲人類求自由而戰、諸生於學校中之活動、實能與國家以莫大之助力。

諸生之爲紅十字會會員者、必將飽受捨己救人之教訓、而知爲本國且爲世界萬國服務。必將能擲節一己之金錢衣食、以救他國凍餒欲斃之孩童。必將能工作製造、以供給傷兵災民之所需。自此以後、爾曹且將飫聞紅十字會急公好義、救人於難之消息或故事。總之、諸生此次由教師指導而得之經驗、必遠勝於平時課室之教訓、以備將來爲此可愛之國之良好國民也。

余亦深望全國之爲教師者。急應紅十字會之請求、而將各該學校、改爲該會之輔助機關。蓋如是則全

國兒童皆將於教師訓練指導之下、各盡其所能、以爲國服務、必將與國家以無限之助力也。今諸君子正思待時而動、犧牲一切、以助國家之戰勝、此豈非及時之政乎。

時一千九百十七年九月十五日

美國總統 威爾遜

紅十字會之歷史

紅十字會之所由昉

夫兵凶器、戰危事也。兩軍接仗、槍礮交加之餘、死者傷者、充盈溝壑、當其時、苟無人焉爲之救護調治、而任其瘡痍遍體、呻吟呼號、天下慘酷之事、孰有過於是哉。紅十字會之組織、卽以此故。然紅十字會之發生、乃最近數十年來之事。前是妙齡閨婦、孰肯冒險疆場、與軍士爲伍、而爲之洗剔創艾、或爲之調治湯藥者。世有去俗見、排衆難、而毅然決然犧牲一切、以爲看護婦之女傑一、卽奈丁格爾 Florence Nightingale

是。此所以奈丁格爾之名、久已膾炙於軍人之口、人視爲救星者也。

奈丁格爾、生於十九世紀之初、英國富人女也。一生好行慈善事業、雖一禽一木之微、偶有傷損、亦不忍坐視而無睹。本此惻隱之心、此其所以能服務軍營之中、捨身救人、始終如一。某年之冬、奈丁格爾參觀一倫敦醫院。目擊院中污穢不潔、及種種不合衛生之處、慨然自願充該院看護婦、以爲拯救病苦之人、舍我其誰、舍此其更何往。其時父母禁止之、親朋竊笑之、奈丁格爾、不爲之動。卒能棄其文采之衣、梁肉

之食紛華驕奢之居、而苦心孤詣、馳驅歐洲諸國間、以研究醫院之事者、凡十有二年。

奈丁格爾遄回英國未久、正籌建醫院之際、格立米亞之戰事 *The Crimean War* 忽起。此乃英法土耳其三國、共禦俄國南侵之勢力、而戰於俄國南境格立米亞半島者、時一千八百五十四年也。當時野戰醫院管理之不善、不思則已、思之令人悽愴。院中器具設備、一無所有。僅以思古塔里一隅而論、按思古塔里、一小邑也、在土京君士旦丁附近、傷兵二千、雖由戰場救入醫院、而連日調治乏人、依然泥濘滿身、任其

臥伏待斃而已。傷者病者、束之縛之、聚置一處、或且暴露於無鋪無墊之地板上、與虺鼠同居、是尙得謂醫院乎哉。盥洗之時、既無毛巾、亦無肥皂。病者之所充飢、舍粗製牛肉一盂外、別無長物。事無鉅細、非人不治、於斯益信。英政府有鑒於斯、始派奈丁格爾來。思古塔里、入野戰醫院、當看護之任。以婦女而看護軍士於軍營之中、氏其第一人也。隨奈丁格爾而來者、有彼醫院中諸婦。此諸婦者、自彼受重創、病而且篤之軍人視之、奚啻由天降世之活觀音。無何、屋宇麤掃有人、穢氣盡除。病者既得浴其身而易以清潔。

之衣、並得適宜之食品以養其口腹。有不能作家書者、看護婦且代爲之、以慰其離衷。臨時醫院、漸且落成。奈丁格爾、益能發展其才能。於是死者得生、傷者得愈、其數日以增、此皆奈丁格爾及其從者之功也。無怪格立米亞之軍人、崇拜之如神仙、後且爲之募鉅款以報其恩德。奈丁格爾初不之受、辭不獲已、遂盡用其金以設立第一病院看護學校於倫敦。該校卽以奈丁格爾爲名、至今尙在云。格立米亞戰役雖告終、而奈丁格爾功業之影響於人心、則無已時。蓋奈氏慈悲之業、實足以引起世人

博愛之心。杜楠者、Henri Dunant 瑞士之少年男子也、遂著哭索非立那戰場 A Souvenir of Solferino 一書、按索非立那者、意大利北境之一村、一八五九年六月、法意聯軍、嘗大敗奧兵於此、以摹寫彼所目擊戰場之慘況焉。

杜楠於書中且反覆申言奈丁格爾之事業、美則美矣、然孤立無援、成就無多、不若設一萬國聯合會之衆擎易舉也。故其建議之要旨有二。(一)凡事豫則立、不豫則廢。救傷卹災之事、亦宜備之於平時、庶不致臨時倉皇失措、致思古塔里之悲狀再現於將來。

(二) 此種事業、非一國所能獨行、宜萬國聯合組織之。譬諸公共遊戲、一人所能爲者甚微、苟能協力合作、則所成就者遂大。杜氏之書、一時不脛而走、傳誦頗廣。有心之人、爲之感動、遂於瑞士之日來弗 *Geneva* 地方、開一國際會議、與會者凡十四國。結果、一千八百六十四年之日來弗條約、由是訂結、而萬國紅十字會之組織、亦由是告成。此約重要之規定、卽對於戰時救傷之事、各國宜一致協助、而不可有畛域之分。又凡戴有紅十字徽章之醫士、看護人或救傷運車、無論何時、無人得攻擊之。嗣後遵約入會之

國、有加無已。中國亦已入會。查中國紅十字會章程第二章第一條云。本會按照一千八百六十四年各國會訂之日來弗條約、暨一千九百零六年七月六號中國在保和會簽押之陸戰時救護病傷條約辦理。其餘各國之入萬國紅十字會也。正與中國同。瑞士國旗爲紅地白十字形、今紅十字會徽幟袖章等、則用白地紅十字、此亦當時日來弗會議所公定、以紀念瑞士發起是會之功者。紅十字會所以號召天下者、且有二語、一曰人道主義、一曰中立主義。意謂對於病者傷者不問其屬於何國、亦不問其屬於何

教、吾人皆有救護之義務也。

厥後世界婦女之盡力紅十字會事業、得與英國奈丁格爾並駕齊驅者、則有美國之巴頓女士 Clara Barton。當南北戰爭之際、美國尙未有紅十字會之組織、顧其婦女能奮不顧身、毛遂自薦、以充救護婦者、頗不乏其人。巴頓女士、其最著者也。方戰事正殷、巴頓於華盛頓車站之側、見有列車多乘、滿載飢寒交迫、含垢負痛之傷兵而來。時絕無一醫生或看護人焉、過而問其疾苦者。巴頓慈悲之心、遂一發而不可遏。立將諸軍士載往醫院中、爲之滌其垢、裹其創、

製衣衣之、調食食之、慰之問之、且爲之代達家書以安之。

各傷兵之母、於各家書中、聞巴頓女士之名、莫不輸將衣件及食品、俾女士得以分給諸病者。未幾、巴頓且得政府之許可、子身入戰場中、以任救死扶傷之役、無論南北軍人、一律救護之、至戰事告終方止。戰後、巴頓游歷歐土、藉資休息、始聞紅十字會之名。且於一千八百七十年普法戰爭之際、始見兩軍救護隊、連袂共事、以救傷殘、如一家人、每次交綏之後、卽有白衣蔽身紅十字遮袖之醫士及救護婦、結隊

馳赴戰線一帶、以救槍彈所造之災。此非如美國僅恃一二罕有經驗之婦女、以治全軍之傷亡、乃由無數夙經訓練之醫士及看護婦、得各政府之准許、而組織以成、且各有其專司之職務者也。巴頓於歐洲紅十字會組織之完備、救護之敏捷、既讚美不置、且見南北戰爭時、美國諸女傑救護兩方軍人之精神、與紅十字會之人道主義及中立主義、正不謀而合、遂決將是種組織、介紹於美國。

巴頓回美後、果能勸告國人、奔走凡五閱年、美國遂於一千八百八十二年、簽日來弗之條約。而美國紅

十字會亦於是年告成。是皆女士之功也。其第一任之會長、卽以巴頓爲之。

平時之紅十字會

初紅十字會本爲戰時而設、然紅十字之事業、旣以救災卹難爲宗旨、戰爭以外、豈卽無該會活動之餘地乎。世界各國、水火饑饉地震大疫等事、旣時有所聞、是今日兵事可弭、而紅十字會仍無息肩之日也。近年美國紅十字會對於戰爭以外之種種苦痛、救之不遺餘力。故欲考察紅十字會平時之活動者、當求諸美國。試略述之。

· 國紅十字會爲巴頓女士所手創、前已述之矣。歐洲紅十字事業之發達、實以減少戰役慘況之故。然美國斯時、並無戰事。無何、密起根省 Michigan 森林大火起、毀家蕩產者、凡千百人。巴頓聞之、瞿然起曰：紅十字會所以救人者、不問其爲平時或戰時也、是而不救、其孰救乎。於是設一臨時賑災局、募集衣服食品金錢（應者頗衆）等等、率領諸紅十字會救護員、裝以大箱、封以紅十字印章、星夜運往災地、以救彼無家之民。災民於無意之中、驟然得此援助、宜其驚奇萬狀、歡聲雷動也。此次共費八萬金元云。

自此以後、美國人士均已漸知紅十字會功用之大。且謀重行組織、使此會不獨爲戰時救人之利器、如歐洲紅十字會所爲、卽於平時亦當常負救災捍患之義務。國內不有天災人禍則已、一遇不測、是會無不應急赴救、責無旁貸。

紅十字會於密起根森林火災所成之事、消息傳播四方、全國士女聞風興起、或釀以資、或助以力、而謀會務之發達、支會之推廣。是時（一八八二年）密細細貝省 Mississippi 適遇大水、萬頃之田、所植棉或蔗、盡爲波臣所淹沒。千家之村、都成澤國。幸該地紅十字

支會先已設立故能應付裕如三日之間、多量種子、已由遠方採集而至。且示鄉人以再種之術。未幾、一片荒蕪、又一變而黍稷盈疇、華實蔽野矣。此非由該紅十字會先見之明、及辦事之敏捷而何。

此後於莊氏塘 *Johnstown* 之水災、於舊金山之地震、災情既重、紅十字會之活動、亦有日趨於機敏神速之勢。死者葬之、病者醫之、飢者飼之、寒者衣之、災民之失其家室者、且必蓋之以廬幕。一隅有警、全國響應。近者出力以相助、遠者爭匯賑款來。或以電匯、或以郵匯、或以支票、或以現金、莫不以紅十字會爲賑

濟之機關。災禍所經愈多、紅十字事業之重要、亦愈彰彰明。

自一千九百有五年冬以來、美國紅十字會所救之災、已有七十有五次。或爲地震、或爲大火、或爲火山暴裂、或爲洪水、或爲旋風、或爲饑饉、或爲病疫、或爲海船觸礁、或爲礦工遇災。此種被災之區、美國紅十字會、皆能奔赴救援、措置裕如。其活動力誠有可以令人敬佩者焉。然而近年美國紅十字會、不獨能治患於已然、且必求所以防患於未然者。今舉其種種辦法於左、

一、聖誕節期之郵件勸人購貼紅十字會印票以集款也。美國俗尚、於耶穌聖誕期內、莫不片郵往返、贈品雜投、互相慶賀。斯時函札之多、輒倍蕪於平時。使人人必購貼紅十字印票、爲數既夥、集款必鉅。斯款之用途、卽由紅十字會設法以預防癆病是也。既患癆者、得速爲之治、以免傳染於他人。未患癆者、亦使之知所以預防焉。

一、組織游泳隊教人泅水以救生命也。盛夏之際、美人喜浴於湖之濱、河之灘、以是死於水者、每年奚啻千百。此皆由善泳者既鮮、卽能泅水矣、亦未嘗熟

諳水中應急救生之術也。紅十字會有鑒於此、特組織水中應急救生隊、分往各地、教童男女以游泳、且教以於游泳中救人之術。卽有沒於水者、爲時已久、既撈之起、彼等亦能知何以使之復活。自此以後、沒於水而生命復保者、不知凡幾。此應急救生隊者、不獨教人以泅水也、且授人以常識、以治刀傷及心病諸事。凡遇不測之險、皆能應付有方、速而有功。

一、派人分往各家戶曉以衛生之術也。鄉村貧戶、知識缺乏、不知衛生、不知疾病之生於不潔、不知飲食合度、方有健康之望、不知爲兒童勤浴潔衣選食、

以使之日益茁壯。於是紅十字會特設改良家庭衛生服務團、皆以婦女組織之。此諸婦女者、嘗飽受訓練及經驗、皆知家庭經濟、看護兒童、烹調衛生諸術、分往各貧戶、盡力指導、以爲之謀幸福。由是觀之、紅十字會之有造於社會、豈淺鮮哉。

右所述者、不過美國紅十字會服務社會之一斑、舉一反三、可以知其國慈善家活動力之大、實足爲天下矜式也。卽對於中國之災禍饑荒等、美國紅十字會、亦嘗捐鉅款以相賑救助、是可知慈善事業、不可以國爲界也。美國且發行紅十字會雜誌一種、詳論

紅十字之事業、及報告各國之成績、以引起世人對於此事之興味。

此皆大戰以前之情形也。歐戰發生後、美國紅十字會會員、均已馳往歐洲戰地、所費金錢以千百萬元計。一九一七年四月、美國又與德宣戰。今述戰時之紅十字會於左。

戰時之紅十字會

天下之事、必有備而後可以無患、此不待智者而知也。美國於參戰以前、久已著手預備二事。救護服役團之組織、使全國千百婦女以看護爲專業者、必能

隨時應命以爲國家服務此其一也。調查歐洲各國野戰醫院及救傷運車服役之組織法、此其二也。不特是也、美國紅十字會、且已知紅十字之事業、不獨限於戰場而已、又必能養成強有力之男女國民以事國家。是以此次戰釁方開、美國紅十字會除趕辦醫院救傷諸務外、且能兼顧軍人之家族及其子女。蓋今日之幼少、卽他日之國民、不可以其父兄出征、而使之有飢寒之患、暴露之虞、而必衣之食之、安而居之、俾成健強有用之優男秀女焉。甚矣、其用心之周密也。

雖然、茲事體大、非款不辦。且需財之鉅、決非吾人屈指所能計。於是紅十字會戰時委員會、決爲一萬萬金元之捐募、廣登告白、傳播全國。美國人士、急公好義者多。於是有職業者、甯舍其重要之位置以從事募款。美術家亦都不受酬報、而爲該會構思各種廣告之術、以動人之心。未幾四方響應、款資雲集。白翻路城 Buffalo 人民所捐款、嘗用飛艇以運往華盛頓。有一婦售雞蛋一打、而得二千零二金元、以彼張有廣告、必將彼所得、盡助於紅十字會故也。彼勞働家亦都有犧牲一日之傭金、以襄此盛舉者。諸如此類、

全國相同。結果、各處所集之款、且遠逾於委員會之所期望焉。

今紅十字會有款矣、然苟無人焉、願爲之服務、則其事仍不舉。凡爲紅十字會會員者、不可謂既納會費、卽已盡其職也。去年美國紅十字會會員、嘗由四十萬而增至五百萬。其人數之鉅、得無駭人聽聞。且此五百萬男女會員者、莫不爲紅十字會盡力、並多有拋棄他種業務、而專爲該會效勞者。義務服役之種類、可約略舉之於下。

第一、會員等嘗組織幾多救傷運車隊、分赴法國及

俄國戰地、以救護戰壕之傷兵、而送諸野戰醫院中。每一救傷運車隊以一百二十四人組織之。內有隊長隊官隊手機匠及廚役等諸職司。服務於此種救傷運車隊者、大都爲大學生。彼等必遵長官之命、雖必冒險於深夜黑暗之中、或槍林彈雨之下、亦所不辭。

第二、紅十字會更有野戰醫院隊。此種野戰醫院、每距戰線甚近。各有牀鋪、可容五百人。院中各有熟練之醫士看護牙醫外科醫士及各病之專醫、日夜服務不息、以冀病者傷者、得以恢復其健康。去冬、美國

看護婦之往戰地者、已有二千、整裝候命者、尙有九千云。

第三、軍士伏居戰壕既久、瓜代期至、始得回里休息。斯時也、該軍人精神疲倦、泥垢滿身、且必待數日而始有車至、以載之離戰線而去。紅十字會有鑒於斯、特於戰線附近各車站之側、設有一種兵房茶肆、內備菜肴飯食等品、取價極廉。不特是也、此項茶肆、且備有衣具消毒所、浴房、寢室、及活動影戲館、(屋頂堅實不畏炸彈)等等、任軍士等取用消遣、不取酬金。美國紅十字會、曾於法國設立此項茶肆凡十二所、以

備協約國軍士之用。

第四、紅十字會服務之目的、並不以戰地爲限、卽於本國戰時所生之困難、亦多能盡力以解決之、家庭瞻視團之組織、其重要者也。蓋軍人之有家室者、平時貨食之支付恃之、摺據之保管恃之、保險費之給付恃之、稅租之繳納恃之、兒女之教育恃之、家庭之歡樂、遂莫不恃其一身。彼得佳婦者、雖能任其家務之一大部分、然家庭之不可無男子、理至明也。一家之主、今忽遠征、歸期且莫能定、安有不致婦哭兒啼者耶、國家雖視其家室之大小、而酌與贍家之費、然

此尙不足以解決家中一切困難。蓋彼妻子之所需要、不徒在金錢而在得有照顧及撫恤之人、俾能與此新境遇相安、而無所憂慮。美國紅十字會所以組織家庭瞻視團者、卽欲應此需要也。對於軍人之家族、凡政府之所不能爲力者、該團實能補其缺。例如家務之遇不易解決者、該團則派有經驗之服務員爲之規劃、爲之應付。遇有疾病者、該團則爲之設法診治。見有婦女兒童之出外工作者、該團則注意其衛生之問題。家中多兒女者、該團且教之以遊戲、以使之轉悲爲歡。

不特是也、家庭瞻視團且將爲軍人妻子之貧者謀職業。所事職業、苟不相當、且將爲之謀更易。保險公司之交涉、亦必爲各家清理之。苟遇欺騙婦女之市儈、亦必爲之懲處之。或遇各種與人糾葛之事、亦必爲之延律師以保護之。兒童之在學齡期限而失學者、亦必以求學規勸之。總之、家庭瞻視團之意趣、在照顧軍人之家室、使在外者得專心戰事、絕無所牽掛、且得於戰後回家之日、見其家人兒女、莫不健康而歡樂也。

第五、對於傷兵之失其能力與自由者、政府已爲之

援助、紅十字會則將爲政府之助手。嘗見帶傷回國之兵士、或喪其明、或傷其體、或失其股肱、以致不能再從事於平日所操之職業。政府必與之更始、授以一新技能而後可。此事也、美政府已實行之。瞽者則重教之識字書寫、並授以編物製籃等技。兵士之失其右手者、則教以用左手。其有從此不能步行者、則教以新職業、使之有所事事、且得生計上之獨立。加拿大之醫院、對於此項事件、進行不遺餘力、故其成績之佳、非世人意料所及。萬國紅十字會宜取以爲法也。於此紅十字會之可以爲政府助者、卽爲兵士

之受新教育者、謀職業與位置、或勸之力求學業之進步、不使半途而廢、或勉之以人人必求自活之忠言。

第六、在被敵軍蹂躪之地、紅十字會對於災民之老者壯者、救之既已不遺餘力、而於彼中孩童、亦豈可長此忽視之。是以美國紅十字會、特又派往歐洲多數醫士及看護、專以救護襁褓爲事。蓋今日之嬰孩、果成病弱、則異日成人、亦必爲病弱之國民、是國家所受戰事之影響、將愈不堪設想也。

果也、紅十字會所派之醫士及看護、初臨戰地之時、

適遇一不測之危事。是故災民望之、不啻大旱時之望雲霓也。於法國北境小城之附近、德人忽放毒氣炸彈無數。災區之民、老者壯者固可戴面具以避之、然此不足以保護嬰兒也。救之之法、惟有送往他地而已。巴黎紅十字總會、得此電信、遂遣醫士看護及其他人員、共十餘人、馳往災區。據彼等所見、兒童之中、未及晬歲者、共二十一人、其餘則均在八歲以下。不問有病與無病、均被置於一污穢而且建築未成之小屋中。醫士等一到、即將該童等移置於清潔新建之收容所。衣之以適體之衣、食之以衛生之品。其

有病者、則別置病室而護視之。同時、紅十字會且於此建築新舍、備浴室、設學校、辦遊戲場、以備不久將有五百兒童來此云。

第七、紅十字會在外國之服務、醫院器具之供給、無一而非由國內備之。故國內會員之服務、協力合作之成績、亦頗重要、不能闕之而弗述也。外科醫士所需之衣及包傷物品等等、實無窮盡。美國紅十字會、遂於國內組織外科包傷物品製造班無數、以教婦女兒童、手造壓緊布、拭污布、褥墊卷軸等品、以供傷兵之用。至於醫院所用各式衣服、如制衣短褂、浴衫

圍裙等、則由會員各於家中製之。所成之數、以千萬計。看護婦之教練、亦爲一大問題。蓋優等之看護婦、既已送往戰地、則其所遺之缺、不可不有以充補之。紅十字會遂於各處設立看護婦傳習所、不獨養成以看護爲職業之人、卽普通婦女、亦得學習看護之術以備家中之急需、卽如是亦足以間接的增加服務於醫院者之人數也。

個人對於紅十字會應盡之義務

如前所述、紅十字會者、世界之福星也。各國政府、莫不承認其救人之勳績、故雖於戰時、人無有敢犯紅

十字會徽章者。職是之故、世人往往有假該會徽章以偵察軍事者、亦有非戰鬪員、利用之以謀一己身體財產之安全者、亦有犯罪之人、藉其保護以逃法網者。其他種種之濫用、殆難悉數。以是紅十字會之進行、未免遲緩。雖然、此非紅十字會之過、乃彼無恥之徒之所爲也。吾人既爲紅十字會惜、吾人愈不可不盡發展紅十字事業之義務。

紅十字會者、世界一大組合也。不限於國籍、不限於教派、不限於男女、更不限於長幼、皆可爲紅十字會之會員。不論何時、不論何地、不論何人、皆可以爲紅

十字之事業。前既述美國紅十字會男女會員之所事事矣。今更言其兒童會員之活動。

自兒童會員部之組織。於是全國人民、莫不可爲紅十字會之一分子。美國總統威爾遜、亦卽紅十字會之總裁、其宣言有曰。兒童之爲紅十字會會員者、卽知所以助國戰勝者也。夫兒童可以爲紅十字會之助力者、其道正多。彼孤兒院童子、携筐持籃而赴菓園、採取葡萄者、亦戰事協濟之一部也。所收葡萄、則由紐約某校之烹飪班、煮而熟之、擣成果漿、盛之瓶中。更由該校之木工班、裝於木箱、以備運往法國戰

地。彼戰士等於無意中得此，豈不將喜形於面乎。由是觀之，紅十字會者，乃世界萬國共同組織之大會社，將欲達吾人同一之目的者也。是乃社會之服務。是乃吾人本民胞物與之念，而能以有濟無，以富救貧，以逸助勞之事業。蓋救災扶困，若由個人自爲之，則必事倍而功半，協力合作，其效乃大。夫如是則人人能貢其所長也。社會服務之事，無人不可以加入者。區區機件，苟或失之，則全部之機，必將運轉不順。是以紅十字會全體行動之敏活，亦不可不恃兒童之助力。

統觀歐美紅十字會之發達吾人當思人之好善誰不如我爲國服務可以興矣。

